

Galicia Encantada



ANIVERSARIO
2005 * 2025
Enciclopedia de Fantasia Popular de Galicia

CATEGORÍAS RELACIONADAS

Micromitos 125: Os pagaiños

Denominación curiosa, seguramente derivada de ‘pagán’ no seu dobre significado de non cristián e habitante — paisano, aldeán— de *pagus*.

Destes seres con esta denominación, aínda que son en todo equiparables aos mouros, temos referencia de A. González Pan e X. C. Beiro (Estudios Mindonienses, 20).

Moran onde chaman Pena do Golpe, preto da Pena Abaladoira do Pereiro, en Alfoz, nunhas penas que levou ata alí ás costas unha vella. Algúns residen no castro do Coto da Croa, na Arnela, e outros no castro da Rúa, a menos dun quilómetro da Pena Abaladoira.

Teñen figura humana, ás veces levan a cara oculta ou son invisibles, visten roupa vella e esmendrellada, levan o pelo longo e andan descalzos.

Lávanse no río e non soen parolar cos humanos que lles falan. Aínda sendo invisibles se non te apartas do camiño por onde pasan, tíranche pedras e areas, e incluso empuñan a quen lles corta o paso.

Seica bailan e cantan moito ben enriba da Pena do Golpe e das Penas do Pozo Mouro. Son os construtores de todos os recunchos, covas, buratos, pías e demais figuras que teñen os penedos do Xistral.

Serie: Micromitos

Publicación: *Nós Diario*, 24 de febreiro de 2021.